



*Jumat, 05 Maret 2021*  
**Ogen: Pilipi 3:12-14**



**Kiam Kempak Tujun**



**M**asa depan adalah milik mereka yang percaya akan keindahan mimpi mereka (Eleanor Rosefelt). Tuhukal pengajaren enda man banta ras man anak-anakta, i ja perlu kal kita rusur bermimpi, bercita-cita guna masa depan. Biasana pe mimpi e ku si mehuli, mehaga ras berwibawa. Adi lit dengalah cita-cita anakta umpamana jadi guru, Polisi, Dokter, Pengusaha, Perbinaga, Youtuber ras si debanna e mehuli denga sebab lit perayakenna ku masa-masa si reh. Di kune lanai lit cita-citana em simberatna, la lit perayaken. Bagepe moria di lit denga sura-suranta ku siterulin e mehuli asangkan lanai ersura-sura. Jadi si perlu genduari e me nuanken sura-sura, entah bermimpi. Saja i bas bermimpi e lit baleng-balengna kata Dibata.

Paulus selaku perberita si meriah pe bermimpi, eme nandai Kristus ras kuasa kekelengenNa. Guna ndatken mimpina e, nina Paulus, 'aku tetap erpala-pala,' ertina lit je perjuangan, la mesunah leja, megenggeng, ras iusur-usurna asa gegehna. I bas erpala-pala e lit pe runga-rungana la ngkurangi semangatna. Bagi sekalak si lit bas pertandingan lomba lari, adi kena kaca entah kena duri nge nahena e labo mis ia ngadi, iteruskenna kiam gelah ula tading. Bagem igambarkan Paulusjuangenna guna nandai Kristus ras nenganami kuasa keleng ateNa. Kuasa keleng ateNa e situhuna pemere Dibata, eme keselamatan ras kegeluhen si rasa lalap. Keselamatan e labo usahanta tapi perkuah ate (anugrah) si enggo isikapken Dibata man banta.

Desken piala si enggo isikapken panitia i bas sada pertandingan, janah piala e itamakan i bas garis finish. Ise si seh ku garis finish e, ia si ndatken piala, e maka la banci lang kerina peserta lomba lari e erjuang seh ku garis finish e gelah ndatken piala kemenangan e. Piala man banta eme kegeluhen si rasa lalap si enggo isikapken Dibata. Bagi nina Paulus tempa-tempa piala kemenangan e lenga ku dat, emaka aku tetap erjuang, ku lupaken kerina si arah pudiku janah kiam aku kempak si arah lebeku. Bagi semangat Paulus e min semangatta meraih mimpi ras anak-anakta, la murah putus asa, di kune gia melala rintangan rikutken situasi jaman enda. Covid 19 si lenga erkedungen, situasi belajar daring man anak-anakta, kita erdahin i rumah nari (WFH), kerina e nambahi semangat juangta, rikut ras kinitekenta man Dibata.